



Komunikadu Imprensa
Munisípiu Lautein
18 Marsu 2020

**JSMP kontinua subliña direitu grupu vulnerável sira bainhira fasilita treinamentu iha
Munisípiu Lautein (Lautem)**

Iha 12 Marsu 2020, JSMP realiza treinamentu kona-ba demokrásia, kna'ar órgaun soberanu sira-nian, partisipasaun públika iha prosesu halo lei, direitu umanus no asesu bá justisa formal, iha Aldeia Kuluhun, Suku Fuiloro, Postu Administrativu Lospalos, Munisípiu Lautein.

Partisipante sira ne'e mai husi Grupu LGBTI, família hosi Grupu LGBTI, estrutura aldeia, comunidade no envolve mós ema ho defisiénsia. Totál partisipante sira hamutuk ema na'in 30.

“Treinamentu bá comunidade ne'ebé envolve LGBTI no ema ho defisiénsia nu'udar meu ida atu kapasita sira kona-ba sira-nia direitu no devér iha prosesu demokrátika no asesu bá justisa formál. Aleinde ne'e, iha tempu hanesan hasae koñesimentu bá sira nia-família, autoridade iha aldeia no comunidade iha jerál katak ema hotu iha direitu hanesan la bele halo diskriminasaun bazeia bá orientasaun seksuál ka kondisaun fíziku,” dehan Diretór Interinu, Sr. Casimiro dos Santos.

Membru LGBTI no ema ho defisiénsia dala barak hetan diskriminasaun no violénsia oioin iha sociedade, até hosi sira-nia família rasik. Tanba ne'e liuhusi treinamentu ne'e, bele promove sira-nia koñesimentu kona-ba sira-nia direitu hodi luta hasoru prátika diskriminativu sira.

Xefe Juventude Munisípiu Lautein Sr. Thomas Ely Timor sente orgullu no hato'o agradesimentu bá JSMP tanba bele realiza treinamentu iha sira nia aldeia. Sr. Thomas haktuir katak treinamentu kona-ba demokrásia no asesu bá justisa foin primeiravés realiza iha sira nia aldeia. Ho nune'e, nia konsidera treinamentu ne'e importante tebes no liuhusi treinamentu ne'e bele ajuda comunidade sira bainhira hasoru problema tanba durante ne'e comunidade sira la kanaliza problema sira tuir nia dalan.

Durante treinamentu ne'e comunidade sira antusiasmu tebes hodi rona esplikaun no hato'o sira nia preokupasaun relasiona ho aplikasaun sistema demokrásia iha Timor-Leste no krime inestu.

Hatan bá kestaun aplikasaun sistema demokrásia iha Timor-Leste, JSMP esplika kle'an liután kona-ba signifkadu husi demokrásia, sistema governasaun iha TL no kompeténsia presidente tuir konstituisaun. Entretantu kona-ba krime inestu, JSMP esplika kona-ba natureza krime inestu no aplikasaun pena bá krime ne'e tuir rezultadu monitorizasaun JSMP nian. Aleinde ne'e, iha oportunidade ne'e JSMP mós esplika kona-ba krime infantisídiu ne'ebé tuir loloos la fô sala

de'it bá fetu ka bebe nia inan maibé tenki investiga mós terseira pesoa hanesan mane ne'ebé fó oan ka família sira ka ema seluk ne'ebé kontribui bá krime ne'e akontese.

Atividade treinamentu ne'e, realiza tanba hetan apoiu finanseiru hosi Governu Austrália liuhosi Embaixada Austrália iha Timor-Leste-DFAT.

Atu hetan informasaun liutan favor kontaktu direktamente:

Casimiro dos Santos

Diretór Interinu JSMP

Diresaun e-mail: santos.cas76@gmail.com

info@jsmp.tl

Telefone:3323883 | 77257466